

# Descrit il misteri da l'art da Giovanni Segantini

**L'eivna passada ha preschantà l'autur tudais-ch Michael Krüger sia paschiun e seis entusiassem per Giovanni Segantini a Scuol. El ha descrit in möd litterar la vita e las ouvas dal pittur cuntschaint chi ha vivü ils ultims ons da sia vita in Engiadin'Ota.**


NICOLO BASS

«Eu vögl verer mias muntognas», sun stats ils ultims plets da l'artist Giovanni Segantini in settember dal 1899 cuort avant sia mort ill'età da be 41 ons. Cun lavurar vi dal seguond purtret da sia triologia d'eira'l crodà insembel da las doluors d'ün'inflamaziun dal bögl orb. Invezza d'acceptar seis destin serrà aint in chamonna, ha'l vulgü serrar ils ögls dadoura i'l liber in vista a sias muntognas amadas. El es stat ün pionier da la pittüra suot tschêl avert e seis purtrets cun cuntradas muntagnardas sun cuntschaints sün tuot il muond.

Üna malatia maglina e bler temp d'ürant la pandemia sun eir stats ils motivs dal cuntschaint autur tudais-ch Michael Krüger – chi ha dal rest manà blers ons il Carl Hanser Verlag – da's dedichar intensivamaing a la pittüra da Giovanni Segantini. El ha publichà dal 2022 ün cudesch cun descripiuns litteraras davart ils purtrets da Giovanni Segantini.

## Lectüra illa Poesia Clozza

In venderdi passà ha prelet l'autur Michael Krüger our da seis nouv cudesch illa libreria Poesia Clozza a Scuol. Quist arrandschamaint es gnü moderà dal editur Giovanni Ravasio. La vainchina da plazzas sun statta occupadas svelte e tout las preschaintas ed ils preschaints han pudü as persvader da la paschiun e da l'entusiassem dal scriptur, poet ed editur Michael Krüger per las ouvas e la vita da Giovanni Segantini. Fingia be pro l'introducziun es l'autur rivà in ün'euforia speciala da bod ün'ura, e quai sainza preleger be üna frasa da seis cudesch. «Ed uossa pudaina discorrer



L'autur Michael Krüger ha descrit cun gronda paschiun las ouvas da Giovanni Segantini. Seis cudesch ha'l preschantà in venderdi passà illa libreria Poesia Clozza a Scuol.

fotografia: Nicolo Bass

amo trais uras sur dal cudesch e sur da las ouvas da Segantini», ha'l dit cun tour flà davo l'introducziun.

Michael Krüger vaiva inscuntrà avant daplü co 50 ons il prim purtret da quist artist muntagnard, ad el quella jada amo incuntschaint, in ün museum a Berlin. E quist cuort inscunter til es adüna restà in memoria. Pür ons plü tard ha'l lura vis ün seguond purtret in ün museum a München e quista jada s'ha'l interessà plü intensivamaing da l'artist. D'ürant ils ultims 50 ons ha vistà Michael Krüger bod tuot las ouvas da Giovanni Segantini sün tuot il muond e sco autur cuntschaint e cun seis interess e savair, ha'l gnü la competenza per as dedichar a las ouvas da Segantini.

## Ün'avicinaziun litterara

Seis cudesch «Michael Krüger – Über Gemälde von Giovanni Segantini» es

ün'avicinaziun litterara a las ouvas dal pittur cuntschaint. «Eu nu sun ün istoriker d'art, eu sun simplamaing fascinà da l'entusiassem e l'incletta dal pittur per la bellezza e l'amur per la natüra», ha infuormà Michael Krüger. Ed in seis cudesch ha'l chattà ils drets plets litterars e subjectivs per descriver quista paschiun. El ha constatà d'ürant tuot quists ons, cha l'artist da quella jada es our dal listess lain sco el sves. E cun as dedichar a l'ouva da Segantini, ha'l gnü occupaziun avuonda per cumbatter e survendscher l'aigna malatia. «Ils purtrets muossan, quai chi resta da nus. Ed els paran da muossar quai chi'd es per adüna pers», ha quintà Michael Krüger. Cha da perscrutar l'effet da las ouvas da Segantini saja enorm cumplichà e l'autur discorra dal misteri da l'art fascinanta e gronda. «Il char

Segner varà miss avant quai uschè sco süls purtrets da Segantini, cur ch'el ha s-chaffi il muond», hat dit Michael Krüger a la fin da sia preschantaziun

illa libreria Poesia Clozza a Scuol ed el ha fat valair cha pro Segantini sajan ils umans e la natüra ün'unità omogena.

## L'artist Giovanni Segantini

Il plü cuntschaint pittur da la natüra alpina dal 19avel tschientiner ha gnü ün'infanzia fich greiva: Giovanni Segantini (1858 – 1899) es nat ad Arco, chi tocchia quella jada amo a l'Austria. Ill'età da set ons ha'l pers a sia mamma e sia naziunalità. Sco giuvnot e'l rivà a Milan e s'ha inscrit ill'academia d'art a Brera. Sias ouvas han bainsvelt fat viadi pel muond intuorn. El sves es rivà in Grischun ed ha vivü a Malögia tscherchond la

glüm ideala illa natüra alpina. D'ürant la lavur per seis «Alpen-Triptychons» es el mort cun be 41 ons dadour üna chamonna a Puntraschigna. Cha seis ultims plets sajan stats «Voglio vedere le mie montagne», vegna scrit illa litteratura, tanter oter eir i'l cudesch da Michael Krüger chi descriva in möd litterar las ouvas da Giovanni Segantini. Quist cudesch ha preschantà l'autur sves l'eivna passada illa libreria Poesia Clozza a Scuol. (nba)

# Daspö 25 ons paschiun, inscunter ed inspiraziun

**«La Vouta» a Lavin es ün'instituziun chi promouva cultura ed inscuters ed es gnüda fundada avant 25 ons, nempe als 27 settember dal 1997. I's tratta d'üna società cun raduond 300 commembras e commembers chi vain manada d'üna suprastanza chi consista da quatter personas.**

In Engiadina Bassa existan diversas societats chi promouvan la cultura indigena ed estra e chi spordschan üna gronda paletta d'arrandschamaints culturals per tuot ils gusts. Üna da quellas instituziuns es «La Vouta» a Lavin chi'd es activa fingia daspö raduond 25 ons e chi spordscha art manüda d'ota qualità cundida – tenor aigna descripiun – cun «ün pa magia». Il lö da cultura «La Vouta» es dachasa a Süzöl 4 a Lavin in ün local cun vouts e da quels deriva eir il nom.

L'instituziun es üna società classica cun raduond 300 commembras e commembers, impustüt indigens, e chi organisescha e promouva arrandschamaints culturals cun artistas ed artists indigens e d'ütro. La radunanza generala da la società es per regla minch'on d'ütuon. La suprastanza da la società



Ils vouts illa chasa a Süzöl 4 a Lavin han dat il nom a «La Vouta».

fotografia: mad

fuorman Anna Serarda Campell e Gianna Olinda Cadonau sco presidi, Johannes Bernhard Campell ed Anna Tina Casanova.

## Impustüt teater

Anna Serarda Campell declera ils intents da la società: «Nos böt es d'organisar produciuns da teater in tuot seis genres. Mi'incumbenza es tanter oter d'organisar il program, cun quai ch'eu

n'ha üna buna survista davart produciuns actualas per il palc pitschen, Gianna Olinda Cadonau e Johannes Bernhard Campell s'occupan tanter oter da las finanzas ed Anna Tina Casanova es respunsabla pella reclama, per placats ed oter plü.» Sco scienziada da teater ed activa illa scena da teater liber daspö passa 20 ons ha Anna Serarda Campell buns contacts e relaziuns cun artistas ed artists in tuot la Svizra. Il böt

saja d'üna vart da preschantar adüna darcheu «fatschas frais-chas» sül palc da La Vouta ed al listess mumaint dad accompagnar ad artistas ed artists a lunga vista in lur carriera.

In mincha cas programmescha «La Vouta» be tocs da teater, chi nu sun amo mai gnüts muossats in Engiadina, uschè cha'l local da cultura spordscha trasoura «premieras engiadinaisas». Anna Serarda Campell: «Nus organisain

intuorn 15 arrandschamaints l'on e l'interess dal public es amo adüna fich viv. E quai es stat da prüma innan uschea. Avant cha nus vain organisà la prüma occurrenza dal 1997, vaina fingia gnü passa 200 commembers. Quai muossa chi d'eira fingia quella jada avantman ün grond interess.» La finanziaziun da la società vain procurada, sco cha Anna Serarda Campell declera, cullas entradas da commembranzas, cun sponsurs e cun instituziuns chi sustegnan la cultura.

## Suvent cuminà cun üna tschaina

Las rapreschantaziuns in «La Vouta» han lö per regla aint il suler grond cun ün palc chi's po variar illa grondezza. Anna Serarda Campell: «Nus vain gnü fingia fin intuorn 100 spectaturas e spectatur, quai dependa da la grondezza dal palc. Las occurrenzas sun bain visitadas e nossa sporta ha success.»

Üna specialità da «La Vouta» es insè eir il program intuorn ils singuls arrandschamaints. I dà nempe adüna avant l'occurrenza üna tschaina chi s'affà tematicamaing cul toc chi vain lura giovà. Uschè cha'ls visitaduors han eir la pussibilità da discorrer culs artists d'ürant e davo la tschaina – obain davo il toc. Benedict Stecher/fmr

Ulteriuras infuormaziuns as chatta s'illa pagina: [www.lavouta.ch](http://www.lavouta.ch). Il prosem arrandschamaint es ils 25 da favrer 2023.